

RESOLUCIÓN REITORAL DO 16/06/2025 POLA QUE SE CONVOCA O PROGRAMA DE AXUDAS FINANCIADO POLA EXCELENTÍSIMA DEPUTACIÓN DE PONTEVEDRA PARA O DESENVOLVEMENTO DE INICIATIVAS INVESTIGADORAS PROMOVIDAS POR PERSOAL INVESTIGADOR DOS CAMPUS DE VIGO E PONTEVEDRA PARA O ANO 2025

A investigación, como actividade orientada a xerar novo coñecemento, de conformidade co establecido no artigo 101.1 dos Estatutos da Universidade, constitúe unha función esencial da Universidade e un dos fundamentos da docencia. Para tales efectos, a Universidade asume o desenvolvemento da investigación científica, técnica, humanística e artística, así como a formación de persoal investigador, atendendo tanto á investigación coma ao desenvolvemento experimental e tecnolóxico.

En virtude das facultades outorgadas pola Lei Orgánica 2/2023, do 22 de marzo, do Sistema Universitario e o artigo 29 do Decreto 13/2019, do 24 de xaneiro, polo que se aproban os estatutos desta Universidade,

ESTA REITORÍA RESOLVE:

1. Convocar Axudas a Equipos de Investigación dos Campus de Pontevedra e Vigo, en réxime de concorrencia competitiva, que serán xestionadas de acordo coas bases reguladoras que figuran no Anexo I.
2. Ordenar a publicación desta convocatoria e as bases que a regulan no taboleiro da sede electrónica <https://sede.uvigo.gal/>.

Contra esta resolución, que esgota a vía administrativa, poderase interpoñer recurso ante a xurisdición contencioso-administrativa, no prazo de dous meses contados a partir do día seguinte a publicarse, de conformidade co disposto na Lei 29/1998, do 13 de xullo, reguladora da xurisdición contencioso-administrativa.

Non obstante, as persoas interesadas poderán optar por interpoñer un recurso potestativo de reposición, no prazo dun mes contado a partir do día seguinte á publicación da presente resolución, perante o mesmo órgano que a ditou. Neste caso non caberá interpoñer o recurso contencioso administrativo antes citado, namentres non recaia resolución expresa ou presunta do recurso de reposición de acordo co disposto na Lei 39/2015, de 1 de outubro, do procedemento administrativo común das administracións públicas.

REITOR

P.D. R.R. 30/05/2024 (DOG de 10/06/2024)

A Vicerreitora de Investigación, Transferencia e Innovación



ANEXO I

O PROGRAMA DE AXUDAS FINANCIADO POLA EXCELENTÍSIMA DEPUTACIÓN DE PONTEVEDRA PARA O DESENVOLVEMENTO DE INICIATIVAS INVESTIGADORAS PROMOVIDAS POR PERSOAL INVESTIGADOR DOS CAMPUS DE PONTEVEDRA E VIGO

1. Obxecto

A presente convocatoria ten por obxecto o financiamento de iniciativas de interese para a Universidade de Vigo e a Deputación de Pontevedra, apoiando as investigacións que contribúan ao desenvolvemento social e económico da provincia de Pontevedra e ao coñecemento da súa realidade, así como a especialización do Campus de Pontevedra-Campus CREA. Para iso financiaranse actuacións relacionadas cos ámbitos socioeconómicos máis propios da provincia, ou calquera outro sempre que se xustifique axeitadamente a súa relación coa provincia de Pontevedra, dentro da liña de medio ambiente.

Ao mesmo tempo pretende ser unha vía para que persoal investigador a tempo completo máis novo e os que teñan máis dificultades para acudir a outras convocatorias, podan poñer en marcha as súas iniciativas.

Ademais, esta convocatoria quere contribuír a reducir o desequilibrio entre homes e mulleres dedicados á investigación no sistema universitario de Galicia, en cumprimento do compromiso de eliminación de discriminacións entre homes e mulleres que recolle a Lei 7/2023, de 30 de novembro, para a igualdade efectiva de mulleres e homes de Galicia. Responder ás desigualdades de xénero e tamén un dos obxectivos do Sistema Español de Ciencia, Tecnología e Innovación e así ven recollido o impacto de xénero positivo na reforma da Lei 14/2011, de 1 de xuño da ciencia, a tecnoloxía e a innovación reformase pola Lei 17/2022, de 5 de setembro. Por iso, as axudas que se regulan nesta convocatoria terán en consideración o peso relativo das mulleres nas propostas presentadas, de xeito que se potencie o seu número e a calidade do seu traballo.

De igual maneira, impleméntanse as medidas da resolución reitoral do 18 de xaneiro de 2021, pola que se regula a acción positiva aprobada no Consello de Goberno do 29 de abril de 2019.

2. Características das iniciativas

Poderán ser beneficiarios/as destas axudas o persoal investigador que cumpra os requisitos establecidos nesta convocatoria e que forme parte dun grupo de investigación da Universidade de Vigo (SUXI), que só liderarán unha solicitude por grupo xa sexa como investigador líder 1 ou como investigador líder 2.

As iniciativas realizaranse de forma individual, con un/unha ou dous investigadores/as líder/es e un equipo de investigación acaído coas tarefas a realizar.

Coa finalidade de potenciar na medida do posible a colaboración entre grupos de investigación dos diferentes centros dos Campus de Pontevedra e Vigo, tamén terá a consideración de ámbito diferente para a súa avaliación as iniciativas con persoal investigador de distintas áreas de coñecemento do mesmo ámbito, sempre que as súas tarefas investigadoras se desenvolvan en diferentes centros e se xustifique axeitadamente. Neste caso tamén poderá considerarse a posibilidade de segundo investigador/a líder, aínda que tanto en este como no anterior o primeiro será o responsable da partida orzamentaria.

As solicitudes con dous investigadores/as líderes, ambos/as terán a mesma consideración a todos os efectos, pero será o investigador líder 1 quen presentará a solicitude, fixará o ámbito de aplicación do proxecto e actuará como interlocutor cos servizos administrativos da Universidade de Vigo para os diferentes trámites relacionados coa xestión da iniciativa.

3. Requisitos específicos do persoal investigador

3.1. Requisitos do persoal investigador líder do proxecto:

- Estar en posesión do título de doutor/a, e manter unha relación contractual coa Universidade de Vigo laboral, non funcionarial, a tempo completo ata a data de finalización do período de execución da iniciativa (31/12/2025).
- Non estar contratado/a con carácter indefinido con cargo a unha liña de investigación, nin por duración determinada ou circunstancias da produción con cargo a fondos de proxectos de investigación ou outras actividades de I+D.
- Desenvolver o seu labor investigador nos Campus de Pontevedra e Vigo, entenderase que a pertenza a unha das xuntas de centro destes Campus é condición suficiente, o resto do persoal deberá acreditar a súa adscrición investigadora a estes Campus durante todo o período de execución da iniciativa.
- Non ter sido investigador/a principal en ningún outro proxecto de investigación de carácter competitivo de ámbito local, autonómico, estatal ou europeo.
- O persoal investigador beneficiario dunha axuda posdoutoral que inclúa un período de estadía non poderá figurar como investigador/a líder no transcorrer desa fase do contrato.
- Ningún investigador/a líder poderá figurar na solicitude de máis dunha iniciativa desta convocatoria.

3.2 Requisitos do persoal do equipo de investigación:

- Ter unha relación contractual coa Universidade de Vigo funcionarial ou laboral a tempo completo con capacidade para desenvolver tarefas investigadoras
- Estar contratado/a con carácter indefinido na liña de investigación na que se encadre o proxecto ata a data de finalización do período de execución da subvención (31/12/2025).
- O persoal investigador en formación predoutoral contratado co motivo de superar un procedemento de selección de persoal en concorrencia competitiva convocado por calquera entidade do sector público deberá presentar a correspondente autorización.
- Desenvolver o seu labor investigador nos Campus de Pontevedra ou Vigo, entenderase que a pertenza a unha das xuntas de centro destes Campus é condición suficiente, o resto do persoal deberá acreditar a súa adscrición investigadora a un destes Campus durante todo o período de execución do proxecto.
- Ningún investigador/a poderá figurar na solicitude de máis dun proxecto.

4. Prazo, documentación e forma de presentación das solicitudes.

O prazo de presentación das solicitudes abrangue dende o día seguinte á publicación desta convocatoria ata o día 30/06/2025 (14:00 hora peninsular española).

O modelo de solicitude pode descargarse no enlace. Unha vez cuberto e asinado (en formato .pdf) presentarase exclusivamente a través da sede electrónica da Universidade de Vigo (<https://sede.uvigo.gal>) no procedemento SXER - Instancia xenérica.

No modelo de solicitude faranse constar os seguintes datos:



- Datos da persoa solicitante coordinadora do proxecto e investigador/a líder.
- Datos da persoa que actúe como segundo/a investigador/a líder, se procede.
- Datos dos membros do equipo do proxecto, que deberá ser proporcional ás tarefas a realizar.
- Resumo da actuación.
- Obxectivos xerais e específicos.
- Planificación de tarefas, descrición e tempo de dedicación do persoal investigador asignado a cada tarefa.
- Impacto esperado dos resultados para a provincia de Pontevedra.
- Encaixe na liña de investigación da convocatoria.
- Plan de comunicación científica dos resultados.
- Orzamento solicitado pola actuación con indicación dos conceptos de gasto e indicación do importe de cada concepto.
- Relación dos cinco méritos máis relevantes (anos 2022 a 2024) por iniciativa dos recollidos no punto A do anexo II, referidos exclusivamente aos/as investigadores/as líderes, indicarse para cada un dos méritos o código de valoración, a súa descrición e a puntuación que lle corresponde, segundo os criterios aprobados para a Producción Científica no ano 2023 (Anexo I Criterios PI) así como a información xustificativa.

5. Revisión e selección das solicitudes

A instrución do procedemento de concesión destas axudas correspóndelle á Vicerreitoría de Investigación, Transferencia e Innovación.

Finalizado o prazo de presentación das solicitudes, procederase á súa revisión, e publicarse a relación provisoria das solicitudes admitidas e excluídas a trámite, así como as causas de exclusión, no taboleiro de anuncios da sede electrónica.

As persoas solicitantes excluídas disporán dun prazo de cinco días hábiles, contados a partir do día seguinte ao da publicación da resolución para reclamar contra a relación provisoria ou para, no seu caso, corrixir ou completar a documentación. As reclamacións ou emendas presentaranse a través da sede electrónica da Universidade de Vigo (<https://sede.uvigo.gal>) utilizando a instancia SXER-Emenda e mellora da solicitude, indicando no asunto "Convocatoria de axudas a iniciativas de investigación dos Campus de Pontevedra e Vigo 2025", dirixidas á Vicerreitoría de Investigación, Transferencia e Innovación.

Serán causas de exclusión das solicitudes presentadas o non axustarse aos termos da convocatoria, o incumprimento dos requisitos nela establecidos, a ocultación de datos, a súa alteración ou calquera manipulación da información solicitada.

Posteriormente procederase á publicación da listaxe definitiva de solicitudes admitidas e excluídas a trámite no taboleiro de anuncios da sede electrónica.

6. Avaliación, resolución de concesión e réxime de recursos

A selección será efectuada pola Comisión de Avaliación que estará composta por:

- A Vicerreitora de Investigación, Transferencia e Innovación, ou persoa en quen delegue, que será a presidenta da Comisión.
- A persoa que exerza a dirección do Campus CREA, ou persoa en quen delegue, que será a secretaria da comisión



- Tres persoas de diferente ámbito de coñecemento do Campus de Pontevedra e de Vigo pertencentes ao sector PDI con dedicación a tempo completo e vinculación permanente con, polo menos, un sexenio de investigación recoñecido.
- Tres representantes da Deputación de Pontevedra, elixido/a polo Presidente da Deputación de Pontevedra.

Os membros desta comisión non poderán participar nos equipos solicitantes dos proxectos desta convocatoria.

Os criterios de avaliación das iniciativas son os recollidos no anexo II desta convocatoria.

A comisión, de conformidade cos criterios establecidos para a avaliación, emitirá un informe motivado sobre a prelación das solicitudes. Non obstante, non será necesario fixar dita orde de prelación cando o crédito consignado sexa suficiente para atender todas as solicitudes presentadas que satisfagan os requisitos esixidos.

Efectuada a valoración, a Comisión de Avaliación, a través da Vicerreitoría de Investigación, Transferencia e Innovación, publicará no taboleiro de anuncios da sede electrónica a listaxe provisoria de axudas concedidas e denegadas. Fixarase un prazo de cinco días hábiles, que se contarán desde o día seguinte á publicación da devandita listaxe, para que os/as candidatos/as presenten as alegacións que consideren oportunas a través da sede electrónica da Universidade de Vigo <https://sede.uvigo.gal> (Instancia SXER-Emenda e mellora da solicitude). Transcorrido este prazo, a comisión elevará, a través da Vicerreitoría de Investigación, Transferencia e Innovación, unha proposta definitiva de resolución, que se publicará no taboleiro de anuncios da sede electrónica.

Contra esta resolución, que esgota a vía administrativa, poderase interpoñer recurso ante a xurisdición contencioso-administrativa, no prazo de dous meses contados a partir do día seguinte a publicarse, de conformidade co disposto na Lei 29/1998, do 13 de xullo, reguladora da xurisdición contencioso-administrativa.

Non obstante, as persoas interesadas poderán optar por interpoñer un recurso potestativo de reposición, no prazo dun mes contado a partir do día seguinte á publicación da presente resolución, perante o mesmo órgano que a ditou. Neste caso non caberá interpoñer o recurso contencioso administrativo antes citado, namentres non recaia resolución expresa ou presunta do recurso de reposición de acordo co disposto na Lei 39/2015, de 1 de outubro, do procedemento administrativo común das administracións públicas.

7. Incompatibilidades

A axuda é incompatible con calquera outra axuda de entidades públicas e privadas para a mesma finalidade e/ou período.

O importe das axudas en ningún caso poderá ser de tal contía que de xeito illado ou en concorrencia con outras subvencións, axudas, ingresos ou recursos supere o custo da actividade subvencionada segundo establece o artigo 19.3 da Lei 38/2003 de 17 de novembro, xeral de subvencións.

8. Financiación e gastos elixibles

Estas axudas financiaranse con cargo á aplicación orzamentaria 2025 OOV1 131H 641.02 cunha dotación máxima de 39.000.-€. Este financiamento é froito do convenio que se asina coa Deputación Provincial de Pontevedra para o Desenvolvemento de Proxectos promovidos por persoal investigador dos Campus de Vigo e Pontevedra 2025.



A subvención prevista para cada proxecto será de 7800.-€, concedéranse cinco axudas. A dotación única farase inmediatamente despois da resolución da concesión.

As axudas que se concedan deben considerarse destinadas a financiar a actuación só durante a anualidade 2025 e o plan de traballo presentado tamén deberá ser executado en dito ano.

Para a conciliación dos pedidos e para a elaboración dos documentos contables correspondentes estarase ao que dispoña a resolución reitoral que ordene o peche do exercicio orzamentario 2025.

Os equipos de investigación beneficiarios destas axudas non poderán dispoñer daqueles fondos que non teñan sido executados no prazo establecido.

As axudas poderán destinarse a adquisición de material funxible de laboratorio, axudas de custo e gastos de viaxe, e gastos de publicacións correspondentes a 2025, inscrición en congresos que se celebren no 2025 de temática relacionada coa actuación, licencias de software, pequeno material informático (tónor, usbs, etc), servizos externos e outros gastos acaídos, que deberán especificarse na solicitude. Non serán gastos elixibles os de contratación de persoal, nin os de material inventariable.

Admitiranse modificacións de crédito entre conceptos de gasto ata un máximo do 20%.

9. Renuncia

A renuncia á axuda farase por calquera medio que permita a súa constancia, de acordo co establecido no artigo 94 da Lei 39/2015, de 1 de outubro, do procedemento administrativo común das administracións públicas.

No caso de que se comunicase a renuncia, a Vicerreitoría de Investigación, Transferencia e Innovación ditará a correspondente resolución nos termos do artigo 21.1 da mesma lei.

A renuncia á axuda por parte do/da investigador/a líder pasado un prazo de 15 días dende a resolución definitiva, supoñerá a imposibilidade de solicitar un novo proxecto por parte deste/a investigador/a líder na edición seguinte desta convocatoria.

10. Réxime de xustificación e publicidade

1. Todas as publicacións, comunicacións en congresos, relatorios, etc. relacionadas con esta iniciativa deberán facer constar a colaboración e financiamento da Deputación Provincial de Pontevedra.

2. O persoal beneficiario das axudas reguladas nestas bases presentará a documentación xustificativa no prazo dun mes, contado a partir do remate da aplicación da subvención. O/A investigador/a líder deberá de presentar perante a Vicerreitoría de Investigación, Transferencia e Innovación:

- Un resumo breve (máximo dúas follas) dos resultados en relación cos obxectivos propostos. No caso de non acadarse todos os obxectivos deberá xustificarse o motivo. Deberase incluír un anexo cos artigos, comunicación en congresos, capítulos de libro, así como tamén memorias de traballos de fin de grao ou de mestrado ou equivalentes ou calquera outra actividade (relatorios, entrevistas en prensa, asistencia a feiras e xornadas divulgativas, reunións con empresarios ou institucións, etc.) derivada da actuación.
- Unha memoria de máximo 10 follas en forma de artigo, axustándose ao formato que lle será indicado para a súa publicación nun volume especial.



Estas memorias serán analizadas nunha derradeira xuntanza da Comisión de Avaliación para valorar se as iniciativas desenvolvidas cumpriron co indicado na solicitude. Con todas as actuacións que acaden unha avaliación positiva farase unha publicación.



ANEXO II

A valoración de cada solicitude ponderarase do seguinte xeito:

- 10% os méritos do investigador/a principais solicitantes.
- 90% a proposta presentada, segundo a táboa de criterios de avaliación.

A orde de prelación corresponderá estritamente pola valoración acadada. Ás solicitudes corresponden ao ámbito e ao Campus do/da seu/súa investigador/a principal.

A) Criterios de valoración da relación de méritos do/a investigador/a principal ou investigadores/as principais.

Valoraranse únicamente os 5 méritos do/s investigador/a principal indicados no formulario de solicitude. Para a valoración de cada mérito empregaranse os criterios da Producción Científica da Universidade de Vigo, aprobados para o ano 2023 ([Anexo I Criterios PI](#)).

- Non se valorarán méritos non recollidos nos criterios do anexo I ou que non estean xustificados.
- Non se admitirán contribucións pendentes de publicación á data de peche da convocatoria. En caso de ter asignado ISBN, ISSN ou DOI antes de dita data sí serán aceptadas, información que terá que xustificarse.

B) Criterios de avaliación

1. Proposta	1a) Aliñamento da proposta coas liñas de investigación da convocatoria*	20
	1b) Viabilidade da proposta	10
	1c) Xustificación do orzamento	10
2. Interese para a provincia**		30
3. Impacto do plan de comunicación de resultados		10
4. Impacto de xénero positivo***		10
5. CV do Investigador/a principal		10

* Si non encaixa nunha das 13 liñas propostas no apartado 1, xa non será considerada a proposta para avaliación.

**Valoración por parte dos representantes da Deputación na Comisión de Avaliación.

***Terase en conta que a investigadora principal sexa muller ou haxa un predominio de mulleres integrantes do equipo da proposta, ademais de que a perspectiva de xénero estea integrada na proposta.



ANEXO III

De acordo co disposto no artigo 13 do Regulamento (UE) 2016/679, do Parlamento Europeo e do Consello, de 27 de abril, relativo á protección da persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento Xeral de Protección de Datos ou "RXP") e co disposto no artigo 11 da Lei orgánica 3/2018, de 5 de decembro, de protección de datos persoais e garantía dos dereitos dixitais, informámoslle que os datos que vostede nos facilite na solicitude, serán tratados baixo a responsabilidade da Universidade de Vigo, coa finalidade de resolver a Convocatoria de axudas a grupos de investigación dos Campus de Pontevedra e Vigo 2025⁴ e amparados pola Lei orgánica 2/2023, do 21 de decembro, do sistema universitario.

Coa súa participación nesta convocatoria as persoas interesadas autorizan á Universidade de Vigo para a publicación dos seus datos, de acordo cos principios de publicidade e transparencia, cando así se derive da natureza desta convocatoria. Non obstante e co fin de previr riscos para a publicidade de datos persoais de vítimas de violencia de xénero, dita circunstancia deberá comunicala a persoa afectada coa maior celeridade posible á Unidade de Igualdade da Universidade de Vigo ao teléfono 986 813419 ou ao enderezo electrónico igualdade@uvigo.es. Estes datos trataranse durante o tempo imprescindible para cumprir coa citada finalidade e serán conservados durante o prazo necesario para determinar as posibles responsabilidades que se puideran derivar de dita finalidade e do tratamento dos datos.

Vostede ten dereito a solicitar ao responsable do tratamento, en calquera momento, o acceso, rectificación ou supresión dos seus datos persoais e a limitación do seu tratamento. Tamén terá dereito a oporse ao devandito tratamento, así como a solicitar, salvo casos de interese público e/ou exercicio de poderes públicos, a portabilidade dos seus datos. Os devanditos dereitos poderá exercelos a través da sede electrónica da Universidade de Vigo <https://sede.uvigo.gal/> (preferentemente a través do procedemento específico SXER – Exercicio dereitos sobre protección de datos) ou mediante solicitude dirixida ao Reitor da Universidade de Vigo e presentada ante as Oficinas de Asistencia en Materia de Rexistro da Universidade de Vigo ou calquera dos rexistros ou oficina de correos indicados no artigo 16 da Lei 39/2015, de 1 de outubro, do procedemento administrativo común das administracións públicas e remitida á Secretaría Xeral da Universidade de Vigo, Campus universitario Lagoas-Marcosende, 36310 Vigo (Pontevedra). Para máis información: <https://www.uvigo.gal/proteccion-datos>.

Igualmente poderá dirixir dita solicitude directamente á Delegada de Protección de Datos da Universidade de Vigo, ao enderezo electrónico: dpd@uvigo.gal. Así mesmo, se a súa solicitude non é atendida pola Universidade de Vigo, vostede ten dereito a presentar unha reclamación ante a Axencia Española de Protección de Datos (AEPD)."

